

COSMOLOGIA.

Creatio. Eductio totius rei ex nihilo sui.
Vel : Productio substantiae cujusdam ex nihilo sui.
Haec stricto sensu, nam sensu latiori accipitur creatio pro actione omni causae efficienti conveniente.
Ita aliquis v. gr. *creatur* Episcopus.

Natura. Complexus omnium substantiarum creatarum, quatenus vim habent determinatos effectus producendi.

Ordo naturae. Modus omnium substantiarum per fines sibi proprios conspirantium in finem communem.

Naturae cursus. Jugis consecutio effectuum qui a creaturarum viribus producuntur. *Item :* Consecutio effectuum aut phaenomenorum secundum ordinem constantem legum physicarum.

Lex naturae. Principium quo constanter et uniformiter explicantur vires in substantiis corporeis, in similibus rerum adjunctis.

Miraculum. Id quod divinitus fit praeter ordinem communiter servatum in rebus, seu, id quod a Deo fit praeter causas nobis notas.

Magnetismus animalis. Ars obtinendi mira phaenomena in homine praesertim, mediis quibusdam adhibitis sive physicis sive moralibus. Ejus auctor habetur Mesmer, unde mesmerismi nomen sumpsit.